


# IN DÌ D'OGGHI

Conti di Saldigna

## La dì 29 di Malzu di lu 1410

### LU PODESTÀ CUBELLO FILMA L'AMISTÀI DI SANTU MALTINU CHI TORRARÀ A NUDDHA LU GHJUDICATU D'ALBUREA

È cumbinata in dì d'ogghi una di li paggini più nieddhi di la storia salda, lu podestà di Oristanu Linaldu Cubello, chi ghjà da tempu sighi una polittica curiòsa vel di l'invasori catalani, **la dì 29 di malzu di lu 1410 filma cu' lu suberanu catalanu-aragonesu (Regnu di Saldigna) un trattatu d'amistài chi di fattu ni lampa lu Ghjudicatu di Alburea** pa' lu fattu di stà entità suberana e indipendenti. L'amistài veni chjamata "di Santu Maltinu" palchì lu locu undi veni stirrutu lu trattatu è la ghjesgia di Oristanu dedicata pròppiu a Santu Maltinu. Filmésini Pétru Torrelles, locutinenti di lu re d'Aragona Maltinu lu 'Echju e Linaldu Cubello tandu majorali. Cun chista amistài lu Ghjudicatu venarà sminuricatu a malchesatu e assughjittatu a la Curona d'Aragona, e appiù venarà impustata la damnatio memoriae di Albaré, lu nommu storicu di la dinastia e di l'istituziòni chi da secculi e finza a chissu stanti aia unificatu e sigutu li saldi illa cumbatta di liberaziòni nazionali. Ancóra pegghju è chi illi paràuli di la capitolaziòni di Santu



Maltinu, lu nóu malchesi Cubello faciarà punì un rifirimentu a la "naciò sardesca" comu siddhu iddha éra d'accoldu cun lu progettu di résa. Diffatti in chistu trettu li fidéli di la sovranità di la nazioni salda impostani la só' capitali in Sassari (undi s'è appughjatu lu Ghjudici Guglielmu di Nalbona) e prummettini di sighì la cumbatta contra li catalani aragonesi a cassisia costu. Lu più malvistu e malvulutu Cubello cunsigna cussì a lu cussì mintuàtu Regnu di Saldigna, lu 'ntarèssu storicu di Alburèa francu di un locarèddhu minóri intundu a la chi éra la capitali di Marianu: lu re lu 'ntitulési di lu malchesatu di Oristanu e di la contea di Goceanu. Linaldu piddhési dunca pussessu de la residenza ghjudicali di li manni sói, chi da chissu stanti si chjamarà Palazzu di lu malchesi.